

PIILAKA

Tornionväylä kalastusalueen kalastussääntö (meänkielelä)

Ylheimet määräykset

1 §

Tarkotus

Tämä kalastussääntö oon sisänen osa Suomen- ja Ruottinvälistä rajaväyläopimusta.

Kalastus oon luvalista niin Suomessa ko Ruottissa, jos se oon kohthuulista huomihoon ottaen Tornionväylän kalastusalueen kalakannan suojelemisen ja kestäväen käytön.

Lähtökohtana oon se, ette saa' aan aikhaan kohthuulinen ja oikeuenmukanen tasapaino aatellen kans kalakannan ja käyttämisen perspektiivistä kokonaisuutta ja huomiota niin, ette se hyöyntää koko raja-alueen etuja ja käytäntöä.

Kalastussäänön määräykset ja päätökset, jotka sen pohjalta oon ilmoitettu, ei saa olla ristiriissa tämän päämäärän kans eikä Suomen ja Ruottin muuten otetut kansainvälisten tehtävien kans, erityisesti huomihoon ottaen Euroopan ytheistä kalastuspolitiikkaa.

2 §

Käyttöalue

Kalastussäänön määräyksiä käytethään seuraavilla rajaväyläopimuksen 23. artikkelissa ilmoitetuilla ja määrätyillä vesialueilla (Tornionväylän kalastusalue):

- a) Kōnkämäeno ja Muonionjoki ja vielä se osa Tornionväylästä ja net järvet, missä Suomen- ja Ruottinvälinen riikinraja kulkee (rajaväylät),
- b) ne vesijuoksut, jotka oon rajajokien laita-juovia, mutta ei net, jotka oon sivujuoksujat,
- c) Tornionväylän suujuoksuhaarat, ja vielä

d) se osa Pohjanlahtea, joka on Haaparannan satamasta Skomakarenin koilisimphaan kohtaan, Ylikarin itäsimphään kohtaan, Sarvenkatajan pohjosimphaan kohtaan ja sieltä suohraan ithään käsin riikinrajale ja niin siitä etehlään riikinrajaa pitkin Tornion ja Kemin kuntien rajale ja vielä koilisheen kunnanrajaa pitkin manterheele. Net kohitten kortinaattorit, jotka raijaava kalastusaluetta, on piilaakassa 1.

Väyläaluheela tarkotethaan tässä kalastussäänössä Tornionväylän kalastusaluheen sitä ossaa, joka on väylänsuun pohjospuolela, päätettyinä Hellälän pohjosen niemen nokasta Suomen puolela ja Virtakarin niemen Ruottin puolela ja pohjosen puolela sitä suoraa viivaa joka veettynä kulkee Uksein ja Palosaaren eteläisen nokan läpi. Merialuheela tarkotethaan sitä kalastusaluheen ossaa, jonka on tämän viivan eteläpuolela.

3 §

Rauhotusvyöhykkeet

Merialuheela pitää kummanki valtion vesialuheela olla rauhotusvyöhykkeitä laissa määrätyn kalaväylänkurkun lisäksi. Nämät rakentuvva vesialuheista, jotka yltyvä 200 metriä niitten viivojen molemille puolile, joittenka kortinaattorit on piilaakassa 1.

Kalanpyytövehkeitä taikka muita hoitoja ei saa panna eikä käyttää sillä mallin, ette kalojen kulkeminen rauhotusvyöhykkeessä hinnertyy taikka ette kalat ei pääse rauhotusvyöhykkeesheen eikä siinä liikhuun.

Kaikenlainen kalastaminen isola rysälä, pyytövehkeilä, joissa on pohja ja vielä koukkoverkola ja muila vehkeilä, joila pyyethään lohta ja taimenta, on kieleettyä siinä meren osassa, jonka raja on väylänsuu ja viiva veetty Salmenlahen suun etelänpuohleiseltä rannalta Kraaselin ja Tirron saarten etelänpuolten niemien kautta Sellön luotheisen nokan yli Pirikkiön luotheisheen niehmeen.

4 §

Määritelmät

Tässä säänössä tarkotethaan:

- 1) kiinitetty vehe: joheaita, niinku lohiloukot taikka isot rysät, jotka oon tarkotettu ja käythöön samhaan paikhaan vähhiinthään kaheksi vuorokaueksi,
- 2) pikkurysä: pohjaan painotettu rysä, jonka vannekorkeus oon alle 1,0 metriä ja jossa mikhään osa ei ole korkeampi ko 1,5 metriä,
- 3) ankkuriverkko: verkkoa, joka ankkurilla, painoila taikka omala painola laskethaan pohjaan taikka ankkurilla panhaan pohjaan taikka pohjan yläpuolele ja joka ei kulje veen myötä,
- 4) kulleverkko: virrassa kulkeva verkko
- 5) nuotta (nuottaverkko): venheeseen kiinnitetty nuotta,
- 6) uistin: konstila tehty syöttö, vopleri, pörhönen taikka niihin verrattavat houkuttelut, joissa oon koukut ja jotka liikheilä, färilä taikka mallila houkutteleva kallaa othaan,
- 7) käsivehe: vapa, pilkki taikka sen mallinen liikkuva vekutin, jossa oon reivi ja uistin taikka koukku, ja vielä,
- 8) luonosta otettu syöttö: elävä taikka tapettu syöttö ja haijupreparaatti.

5 §

Kalastuksen hoitomakso

Jos kalastuksen hoitomakson pittää maksaa kansalisen lainsää'änön jälkhiin siinä maassa missä kalastusta puohathan niin sen makson häätyy hoitaa lainsää'änön jälkhiin. Ko kalastethaan uistimella venheestä ja jos pittää maksaa ensimmäisen kappalheen jälkhiin, sen häätyy seki maksaa joka venettä soutaa tässä.

Pyytövehkkeet, kalastusaijat ja minimimitat

6 §

Luvaliset pyytövehkkeet

Ko kalastetaan lohta taikka taimenta saapi käyttää vain seuraavia pyytövehkkeitä:

- 1) kiini olevia vehkkeitä merialueella,
- 2) kulleverkkoa ja nuottaverkkoa väyläalueella piilaaka 2. jälkeihin,
- 3) vappaa ja uistinta, ja vielä
- 4) lippoa pyytöpaikoissa piilaaka 2. jälkeihin. Ko muun sortista ko lohta ja taimenta kalastetaan saapi käyttää seuraavia vehkkeitä ja konstia.

- 1) kiini olevaa pyytövehettä merialueella,
- 2) kulluverkkoa ja nuottaverkkoa väyläalueella piilaaka 2. jälkeihin,
- 3) ankkuriverkkoa merialueella ja väyläalueen hitaasti virtaavassa vesissä, suvanoissa ja järvissä,
- 4) mae- ja haukikoukkua ja vielä maeryssää,
- 5) nuottaa merialueella,
- 6) lippoa piilaaka 2. jälkeihin,
- 7) mertaa ja pikkuryssää,
- 8) vappaa ja uistinta ja vielä pilkkiä, ja vielä
- 9) onkiminen luonon syötöillä paitti koskissa ja virtaavissa vesissä. Ko kalastaa käsivehkeillä saapi olla vain kolme uistinta joka vehkkeessä. Ko kalastaa käsivehkeillä vehkkeet pitävä koko aijan olla kalastajan uluttuvilla. Pyytöpaikoissa, joissa kulluverkkoa, nuottaverkkoa ja lippoa piilaaka 2. jälkeihin saapi käyttää, on luvallista laittaa kalastusta varten pyytöpaikkaa siihen kuntoon ko kalastus vaatii. Ko momentti 4. jälkeihin laittaa pyytöpaikkaa ei saa käyttää kallaa pyytäviä vehkkeitä jos tarkoitus on pyytää kallaa sillä aikaa ko laittaa paikkaa kuntoon. Se joka 4. momentin jälkeihin aikoo laittaa kuntoon pyytöpaikan pitää viimistään seitsemän työpäivää ennen alottamista

ilmottaa aikomuksensa Suomessa Lapin elinkeino-, liikenne- ja ympäristökeskukselle ja Ruottissa paikkakunnan polisille.

7 §

Kieletyt pyytövehkkeet ja kalastuskonstit

Muut ko 6. §:ssa ilmotetut pyytövehkkeet oon kiellettyjä. Kaikkien sorttien kalastusta koskee vielä seuraava. Kalastus saukola (harrilauta) taikka sen mallinen kalastuskonsti oon kieleettyä. Ampumavehkeilä, kuolettavala taikka myrkyliselä aihneela taikka sähölä kalastus oon kieleettyä. Kalastus oon kieleettyä käsivehkeilä taikka muila koukuila ko mae- ja haukikoukula ko tarkotus oon koukuta kalan laiasta taikka sillä mallila, ette tämänlaisen pyyön vaara oon selvä. Suun laiasta koukhuun tarttunheen kalan häätyy varsin laskea takasi vetheen. Kalastus arinalla taikka muula vehkheelä, mikä painaa kalan läpi laiasta, oon kieleettyä. Nostokoukkua, jossa oon varsi, saapi käyttää nosthaan kalan, joka oon muula vehkheelä pyyetty kiini. Ankkuriverkola ko kalastaa oon kieleettyä käyttää virtahinteriä, johetta taikka muita kiini olevia laittamisia. Kalan pölättämisen taikka sen kulkemisen hinterhiin tarkotettuja kampheita ei saa laittaa vetheen eikä veen pääle. Kieleettyjä pyytövehkkeitä ei saa pittää venheessä eikä muutenkhaan likelä. Sama koskee muina aikoina luvalisia pyytövehkkeitä. Ampumavehettä, joka oon mettästyksheen tarkotettu, saapi kuljettaa. Merialuheela oon kieltoaikana kans luvalista kuljettaa 6. §:n jälkhiin luvalisia pyytövehkkeitä. Tämä oon voimassa sillä ehola, ette pyytövehkkeet oon siottuja ja syrhjään pantuja.

8 §

Pyytövehemallit ja paikalepanot

Ko pyyethään muun sorttista kallaa ko lohta ja taimenta saapi vain käyttää semmosia kulleverkkoja ja ankkuriverkkoja, jotka oon yksreivisestä verkkovaatheesta ilman pussia (kriimua) ja jotka oon tehty ykssäkheisestä nylonireivistä (monofiilireivi) ja joka on vain 0,20 millimetriä paksu. Meressä oon kuitenkin luvalista käyttää paksumpaa reiviä verkossa, mikä tietää ette silmänkoko oon enniinthään 40 millimetriä. Kulleverkko saapi olla enniinthään 120

metriä pitkä. Nuottaverkko saapi olla enniinhään 200 metriä pitkä Ankkuriverkko saapi olla enniinhään 60 metriä pitkä. Tämä ei kuitenkaan ole voimassa ko kalastaa merialueella elokuun 1. ja huhtikuun 30. välisennä aikana. Tämä ei ole voimassa silloinkhaan ko kalastaa merialueella ankkuriverkoilla jos niiden silmäkoko oon 40 millimetriä. Ankkuriverkkojen välipittuus häätyy olla vähhiinhään 60 metriä.

Nahkiaispyythöön tarkotettu merran nielu ei saa olla isompi ko 16 senttimetriä mihikhään käsin.

Kalastusvehkkeissä, paitti merrassa ja lipossa lohen- ja taimenenkalastusta varten, ei saa käyttää metalilankaa, metalivaijeria eikä vastaavaa.

Väylävesialueella lippoaminen muuta kallaa ko lohta ja taimenta oon luvalista vain lipola, joka oon tehty ykssäkkeisestä nylonista (monofiili) ja jonka reivipaksuus oon korkeinthaan 0,40 millimetriä ja verkosta vähhiinhään 80. millimetrin silmäkoko.

9 §

Pyytövehkkeitten merkkaminen

Kalastusvehkkeet, jotka oon pyythöön tarkotetut, pittää merkata niin, ette merkkauksesta saapi selvää kuka pyytövehkkeet omistaa taikka kuka niitä käyttää ja vielä sen yhtheystiot. Merkkkaus pittää olla helposti nähtävännä niin, ette omistajan taikka käyttäjän huomaa ilman ette pyytövehkkeet häätyy nostaa veestä ylös. Käsivehkkeet, jotka oon käessä taikka muuten likelä, ei tarte olla merkattuja.

10 §

Silmän koko

Väyläalueitten pyytövehkkeitten koko pittää olla:

1) Ko kalastaa lohta taikka taimenta kulleverkola taikka nuottaverkola vähhiinhään 100 millimetriä,

2) ko kalastaa muuta sorttia ko lohta ja taimenta kulleverkoila taikka nuottaverkoila vähhiinthään 80 millimetriä ja enniinthään 100 millimetriä,

3) ko kalastaa ankkuriverkoila vähhiinthään 80 millimetriä ja enniinthään 100 millimetriä, ja vielä

4) ko kalastaa pikkurysälä enniinthään 80 millimetriä.

Merialuheela pyytövehkkeitten silmäkoko pittää olla:

1) ko kalastaa ankkuriverkoila kalapesässä enniinthään 80 millimetriä, ja vielä

2) ko kalastaa ankkuriverkoila toukokuun 1. päivästä heinäkuun 31. päihvään enniinthään 90 millimetriä ja muina aikoina enniinthään 40 millimetriä taikka vähhiinthään 90 millimetriä.

11 §

Kalastuskausi ja rauhotusaijat

Lohen ja taimenen kalastus oon kieleettyä, jos tässä pykälässä ei muuta sanota.

Väyläluheela kaikki kalastus oon kieleettyä syyskuun 15. päivästä joulukuun 15. päihvään, paitti nahkiasen kalastus merrala.

Lohen ja taimenen kalastus käsivehkeilä oon luvalista kesäkuun 1. päivästä elokuun 31. päihvään. Tämän mallinen lohen ja taimenen kalastus oon kuiten kieleettyä pyhästä kello 19 Suomen aikaa (18 Ruottin aikaa) maanantaihin kello 19 (18). Lohen ja taimenen kalastus väyläluheela oon luvalista pyytöpaikoissa piilaaka 2. jälkhiin,

1) lipola juhanusviikolla maanantaista kello 19 (18) pyhhään kello 19 (18), ja vielä

2) kulleverkola ja nuottaverkola juhanusviikon tiistaista tuorestaihin ja kahtena juhanuksen jälkheisennä viikonloppuna perjantaista kello 19 (18) seuraahvaan pyhhään kello 19 (18). Muitten kalasorttien ko

lohen ja taimenen kalastus väyläluheela oon luvalista piilaaka 2. jälkhiin,

1) lipolla vain juhanusviikon maanantaista kello 19 (18) syyskuun 14. päihvään asti, ja vielä

2) kulleverkola ja nuottaverkola vain heinäkuun 15. päivästä syyskuun 14. päihvään asti. Merialuheela muitten sorttien ko lohen ja taimenen kalastus kiini olevilla pyytövehkeilä oon luvalista kesäkuun 11. päivästä lokakuun 31. päihvään asti.

Taimenen kalastus kiini olevilla pyytövehkeilä oon luvalista kesäkuun 17. päivästä kello 12. elokuun 31. päihvään asti. Lohen kalastus kiini olevilla pyytövehkeilä oon luvalista kesäkuun 17. päivästä kello 12. syyskuun 15. päihvään asti.

Kumpikin sopimusosapuoli saapi päättää kansalisten määräysten kautta eri kalastajaroikile hiljemät alotuspäivät ko net jotka oon sanottu 6. momentissa, vaikka kuiten niin, ette ammattikalastus kiini olevilla pyytövehkeilä alkaa viimisthään kesäkuun 29. Tämmöset kansaliset määräykset saattava kans koskea pyytörajotuksia.

Kiini olevien liipettien ja kiini olevien pyytövehkkeitten laittaminen saapi alkaa ennenkö kalastus oon luvalista. Ei kalanpyythöön koskevia johtheita saapi alkaa laithaan vasta seittemän vuorokautta ennen kalastusluvan alkua.

12 §

Minimimitat ja kalojen takasipano

Se oon kielettyä pyytää taikka tappaa alle 50. sentin mittasta lohta taikka taimenta ja vielä alle 35. sentin mittasta harria. Pittuus mitathan leuan piikistä suoraksi veetyn ja yhtheen puristetun pyrstön piikhiin. Kalan, joka täyttää mitan, häätyy elävännä taikka kuohleena päästää takasi vetheen jos se 1) oon pyyetty rauhotusaikana, 2) pyyetty kieletyilä vehkkeilä taikka kieletyllä kalastuskonstila, taikka sitte 3) oon talvilohi

Se, joka 11 §:n 6. momentin varassa kalastaa kiini olevilla pyytövehkkeilä muita sorttia ko lohta ja taimenta ennenkö lohi ja

taimen on luvalisia, häätyy vähhiinhään kerran vuorokauessa kokea kaikki kalapesät ja varovasti päästää niistä kaikki lohet ja taimenet.

Vavala kalastamista ja lippoamista koskevat erityiset määräykset

13 §

Kalakvuutti

Se on luvalista yhele kalastajale pyytää ja pittää yhen lohena taikka taimenen joka vuorokausi.

14 §

Venheen käyttö uistimella ko kalastaa

Lohen ja taimenen kalastaminen käsivehkheilä venheestä, joka on ankkurissa, ei saa häiritä muitten kalastamista.

Ko uistii venheestä muturin käyttö on kieleettyä, paitti suvantovesissä sillan alavirrassa Ruottin Mataringin ja Suomen Aavasaksan välilä. Muturia ei saa käyttää 200. metriä likempänä koskialuetta. Tämän kappalheen kielto ei koske henkilöitä, joittenka huonokuntonen kyky hankaluttaa muturitonta venheen käyttöä.

Lapin elinkeino-, liikenne- ja ympäristökeskus ja Fiskeriverket saattava hakemuksen pohjalta yksityisissä taphauksissa päättää poikkeuksista siittä mitä 2. kappalheen kohassa on, jos erityisiä syitä siihen löytyy. Viranomhaiset pitävä semmosista päätöksistä ilmoittaa toisile.

Muut määräykset

15 §

Viranomhaiset

Net viranomhaiset, joita tarkotethaan rajaväyläsopimuksen 26. artikkelissa, on maa- ja metsätalousministeriö taikka Lapin elinkeino-, liikenne- ja ympäristökeskus ja vielä Fiskeriverket taikka Norrbottenin läänin lääninhallitus taikka se viranomhainen, joka astuu

niitten sijalle ko kysymyksessä on kalastuksen hallinto taikka ko on kysymys kalastussääntöjen poikkeuksista myöntäminen. Sopimuksia lisämääräyksistä, jotka koskevat kalastusta, saattavat solmia Suomen ja Ruottin hallitukset taikka ne viranomaiset, jotka itse kuki hallitus siihen panee.

16 §

Kalastussääntö, jotka poikkeavat määräyksistä

Sen tarkoituksen jälkeihin, joka mainitaan 1. §:ssä tässä sääntössä, saattavat itse kuki hallitus taikka se viranomainen, jonka itse kuki hallitus siihen määrää, yhdessä sopia poikkeavista sääntöistä kalastuksen lupa-aijoista, kalastuskeinoista, luvallisista pyytövehkeistä, pyytövehkeiden määrästä taikka muista teknisistä sääntöistä ja vielä siitä mitä kalastuspaikkoja sääntö 2. piilaa koskee, niissä tapauksissa jos:

1) kalakannan tilanne sen sallii, taikka

2) jos se vaatii huomiota ottamista kalakannan suojelun ja kestävän käytön varmistamiseksi.

Määräykset saattavat rajoittaa olleen voimassa ja koskevan kalastusalueen osaa, kalastuskauten osaa taikka yksittäistä kalastuskeinoa. Määräykset saattavat rajoittaa määrättyksi ajaksi ja yhdeksi kalastuskauksi kerralla mutta saattavat kans syynätä ja muuttaa huomiota ottaen kalakannan säilyttämisen kalastusalueen Tornionväylässä.

Hallitukset taikka ne viranomaiset, jotka itse kuki hallitus päättää siihen pitävä joka vuosi syynätä luvallisen kalastamisen aloittamisen tämän sääntö 11. §:n jälkeihin ja tämän paragraffin ensimmäisen kappaleen jälkeihin ja vielä pitävä yhdessä sopia sovittamisen huomiota ottaen alueen kalakannan tilanteen. Muutokset kirjataan erityiseen, yhdessä laitetaan protokollisiin.

Neuvottelut, jotka koskevat määräysten muuttamista pitäen alottaa siihen aikaan ja mennä siinä tahissa, ette paikalliset puolet kerithään kuulla ja ette on maholisuuksia päättää määräyksistä viimeistään 1. huhtikuuta sinä vuona ko määräykset astuvat voimaan.

17 §

Kalastusluvut

Lapin elinkeino-, liikenne- ja ympäristökeskus ja Fiskeriverket taikka se, jolle viranomhaiset antava tehtäväksi, saattava antaa kalastuslupia siellä, missä valtio omistaa lohi- ja taimenkalastuksen oikeudet. Tämmöstä lupaa pittää kans vaatia soutajalta, joka oon myötä lohi- ja taimenkalastuksessa.

Viranomhaiset saava tehä sopimuksia yhtheisistä kalastusluvista semmosten kans, joila oon väyhlään kalastusoikeus. Yhtheinen kalastuslupa antaa kalastusoikeuen kalastuksheen kalastuslupa-alueela, huolimatta riikinrajasta. Viranomhaiset saattava sopia määräyksistä, jotka koskeva kalastuslupien myyntiä ja rahatulojen tilityksiä ja viranomhaiset saattava kans valvoa yksityisten inträssien kalalupien myyntiä.

Rahatulot tietyn alueen kalastusluvista kuuluva niile, jotka omistavva kalastusoikeuen ja sen rahan määrää niitten ossuet näistä vesialueista. Se ei kuiten ole voimassa ko kysheessä oon valtion kalastusoikeus taikka kalastusoikeus, jonka pohjana oon erityinen perusta, jonka arvon ossuus pittää määrätä sopimuksen 2. momentin tarkotuksen jälkhiin.

Rahatulot kalastuslupien antamisesta tietylä alueela pittää panna Suomen ja Ruottin yhtheiselle tilile.

Ko kalastusoikeuen omistajille oon annettu niitten ossuus, viranomhaiset pitävä käyttää ylijäähneen osan yhtheisesti päätettyihin tehtävhiin, jotka kuuluva valvonan ja tutkimisen puolele tällä alueela.

18 §

Kalastusosotelmat ja kalastuskilvat

Lapin elinkeino-, liikenne- ja ympäristökeskus, Fiskeriverket ja Norrbottenin läänin lääninhallitus saava kalastussäänön määräyksistä huolimatta yksittäisissä taphauksissa ja ko asiasta oon sovittu, myöntää kalastusosotelmien ja kalastuskilvan lupia, ko net oon niitten linjojen jälkhiin, joista viranomhaiset oon sopihneet.

Viranomhainen, joka oon antanu luvan, saattaa lupavilkoorissa

myöntää määräyksistä poikkeavia sallimuksia ko osotethaan perinteisiä kalastuskeinoja kalastusosotelmissä. Luvan siihen myöntää sen maan viranomhainen, missä toiminta tapahtuu. Luvasta pittää ilmoittaa toisen sopimusosapuolen viranomhaisele. Ko asiaa käsitelhään pittää rajaväyläsopimuksen 21. artikkelia käyttää.

19 §

Pyytö tietheelisten päämäärien takia

Lapin elinkeino-, liikenne- ja ympäristökeskus, Fiskeriverket ja Norrbottenin läänin lääninhallitus saava kalastussäänön määräyksistä huolimatta tietheelisten päämäärien takia ja ko asiasta oon sovittu, myöntää lupia, ko net oon niitten vilkkoorien jälkhiin, joista viranomhaiset oon sopihneet. Luvan myöntää sen maan viranomhainen, jossa toimintaa harjoitetaan. Sen lisäksi tarvithaan kalastusoikeuen omistajan lupa. Tietheelisen tutkimuksen takia annetusta luvasta pittää ilmoittaa toisele sopimusosapuolele. Ko asiaa käsitelhään pittää rajaväyläsopimuksen 21. artikkelia käyttää.

20 §

Rajaväyläkomišuuinin lausunto

Semmosta lausuntoa jota tarkotethaan Rajaväyläsopimuksen 11. artikkelin 3. kappalheessa ei tartte laittaa niissä taphauksissa, joissa vasthuussa olevalla viranomhaisella oon nähtävästi vaaittua ja tarpheelista asian ossaamista.

21 §

Valvonta

Lapin elinkeino-, liikenne- ja ympäristökeskus ja Norrbottenin läänin lääninhallitus ja vielä toimiosastot, jotka kummanki maan lainsää'änön jälkhiin valvova kalastusta, net valvova, ette tätä kalastussääntöä nouatethaan. Kummanki sopimusosapuolet hoitava asian niin, ette oon piisaava määrä kalastusperhäänkattojia virassa ja

ette perhäänkattomistyö oon riittävä.

Kalastusta saava tämän lisäksi valvoa yhtheiset Suomen ja Ruottin perhäänkattojaroikat. Tämösessä perhäänkattomisessa toisen maan perhäänkattojien staattys oon myötäolevan kattojan.

Viranomhaiset, joile lain perhäänkattominen kuuluu ja kalastusperhäänkattojat Suomessa ja Ruottissa, pitävä tarpheen jälkhiin vaihettaa informašuunia keskenhään.

22 §

Ylheisen kalastuslainsää'änön käyttö

Jos ei tässä säänässä ole erityisiä määräyksiä, niin itte kunki maan kalastuslainsää'äntö ja sen perustala annetut säänökset oon voimassa.